



KEMENTERIAN PEMBANGUNAN WANITA,
KELUARGA DAN MASYARAKAT

SIARAN MEDIA

SISTEM INFOBENCANA JKM 2.0 TINGKAT AKSESIBILITI INFO RAKYAT

KUANTAN, 21 November – YB Datuk Seri Rina Mohd Harun, Menteri Pembangunan Wanita, Keluarga dan Masyarakat telah melancarkan Sistem InfoBencana JKM 2.0 yang telah dinaiktaraf bagi meningkatkan akses kepada maklumat berkaitan pengurusan bencana dibawah kendalian Jabatan Kebajikan Masyarakat (JKM). Sistem InfoBencana JKM 2.0 ini merupakan aplikasi utama dalam pengumpulan dan pelaporan statistik mangsa bencana bagi memudahkan capaian info bencana kepada rakyat dan semua pihak yang berkepentingan.

Pelancaran pada hari ini merupakan salah satu langkah inovatif bagi menghadapi Monsun Timur Laut 2021/2022 yang bermula pada bulan Oktober 2021 sehingga Mac 2022. KPWK melalui JKM juga telah mengenal pasti dan menyediakan **5,693 Pusat Pemindahan Sementara (PPS)** di seluruh negara yang mampu menampung seramai **1.63 juta mangsa bencana** dalam satu-satu masa. Sejumlah **134 PPS** adalah PPS berkapasiti besar, **1,970** berkapasiti sederhana dan **3,627** berkapasiti kecil. Bagi negeri Pahang pula, sebanyak **778 buah PPS** telah dikenalpasti yang boleh menempatkan **163,875 orang mangsa** dalam satu-satu masa.

“Kementerian turut menjalinkan kolaborasi strategik bersama Institusi Pengajian Tinggi seperti *Japan International Institute of Technology*, Universiti Teknologi Malaysia (UTM) dan Universiti Pertahanan Nasional Malaysia (UPNM) dalam meningkatkan Pengurusan Logistik dan Bantuan Bencana. Di samping itu, kolaborasi turut dijalankan bersama-sama Yayasan Telekom Malaysia bagi meningkatkan perkhidmatan telekomunikasi yang melibatkan Pusat Pemindahan Sementara yang dikenalpasti”, ujar YB Datuk Seri Rina Harun.

Sistem Infobencana JKM 2.0 ini bermula sebagai Sistem Info Banjir yang telah dibangunkan dan digunapakai oleh JKM sejak tahun 2015. Antara **penambahbaikan terkini yang telah dilaksanakan** adalah **penggunaan dwibahasa, menaiktaraf paparan antaramuka, integrasi bersama Jabatan yang berkaitan dengan pengurusan bencana seperti Jabatan Pendaftaran Negara (JPN), Agensi Pengurusan Bencana Negara (NADMA) dan Jabatan Ukur dan Pemetaan Malaysia (JUPEM).** Selain itu, turut dilaksanakan penambahbaikan modul pusat perpindahan, profil penduduk, bantuan pemulihan dan modul pengurusan stor serta tambahan maklumat baru seperti info paras air sungai, maklumat jalan tutup dan senarai fasiliti penyimpanan bekalan. Informasi terkini mengenai pengurusan bencana boleh diakses secara *real time* melalui aplikasi InfoBencanaJKM yang boleh dimuat turun di *Google Play* dan *Apps Store*. Sistem ini juga boleh dilayari di laman sesawang <http://infobencanajkmv2.jkm.gov.my>.

KPWKM yakin Sistem InfoBencana JKM 2.0 ini akan memberi manfaat kepada semua pihak terutamanya seluruh ahli Keluarga Malaysia dalam menghadapi bencana khususnya ketika musim Monsun Timur Laut 2021/2022 pada kali ini. Akses yang cepat dan mudah kepada maklumat-maklumat kritikal berkaitan bencana dapat memastikan tindakan-tindakan pencegahan, rawatan dan sebagainya dapat dilaksanakan dengan lebih cekap dan berkesan serta membantu meningkatkan kesedaran orang ramai mengenai kepentingan siapsiaga menghadapi bencana. Penambahbaikan-penambahbaikan yang telah dibuat juga turut memastikan data-data yang lebih tepat dapat dijana sepanjang masa untuk tujuan pengagihan bantuan, penempatan di PPS dan lain-lain. KPWKM melalui JKM juga akan sentiasa menyemak dan melakukan penambahbaikan secara berterusan dengan kerjasama semua pihak dalam memastikan sistem ini sentiasa relevan dan *up-to-date* mengikut keperluan semasa.

###

Disediakan oleh:
Unit Perhubungan Awam,
Jabatan Kebajikan Masyarakat, Putrajaya

21 November 2021